

十朝东华录

十朝东华录

三月癸丑朔曾國藩奏臣接到家信知臣父於二月初四日病故臣例應丁憂溯查臣自咸豐二年奉命典試江西行至太湖縣聞訃丁母憂回籍百日奉旨飭辦團練三年冬間疊奉援鄂援皖肅清江面之命聲明臣係丁憂人員辦理稍有起色即當回籍補行終喪五年九月蒙恩補授兵部右侍郎維時雖已服闋而臣之私心常以未得守制爲隱憾今又遽丁父憂椎胸自責抱痛何極瑞州去臣家不過十日程途應即日奔喪回籍臣經手事件以水師爲一大端署提督楊載福駐紮九江所統外江水師十五營道員彭玉麟駐紮吳城所統內湖水師八營合計船隻五百餘號職位至二千餘尊之多此非臣一人所能爲力臣在衡州時僅奏明造船百六十號岳州以下雖陸續增添而九江挫後則水師中喪其時同援湖北者僅船百餘號賴彭玉麟力支危局胡林翼楊載福重廓規模而又有廣東督臣購運洋礮湖南撫臣督率官紳廣置船隻藥於是外江之水師始振陷入鄱湖者亦僅船百餘號賴江西撫臣竭力維持增修船礮籌備子藥於是內湖之水師亦振合四省之物力各督撫之經營楊載福等數年之戰功乃克成此一支水軍臣不過因人成事豈敢無其實而居其名惟臣因事離營內外水軍或分歧不定相應請旨特派署提督楊載福總統外江內湖水師事務惠潮嘉道彭玉麟協理外江內湖水師事務庶幾號令歸一楊載福戰功最偉才識遠勝於臣彭玉麟備歷險艱有烈士風伏乞 聖恩時加訓勵該二入必能肅清江面仍請旨飭下湖北撫臣胡林翼月籌銀三萬兩江西撫臣文俊月籌銀二萬兩解交楊載福彭玉麟水營俾此軍不至饑疲則不特爲攻剿九江湖口所必需即將來圍攻金陵巡防長江亦必多所裨益自水師而外惟湘勇係同縣之人實勇係久從之卒於臣略有關繫見在李續賓之湘勇駐紮九江精勁樸實隱然巨鎮劉騰鴻之湘勇曹平亮之寶勇駐紮瑞州嚴明勤謹足當大敵但使餉項稍敷必可樹立功績臣在軍中亦無所益即不在軍亦無所損此外江西水陸諸軍及各省援師自去歲以來皆由撫臣與臣會商調遣今臣丁憂開缺應由福興與撫臣會商辦理近日逆匪內亂武漢肅清袁州奉新等處克復江西局勢似有轉機臣猝遭父喪不復能料理營務合無籲懇 天恩准臣在籍守制稍盡人子之心臣已函商將軍福興巡撫文俊酌請一人前來瑞州拊循各營將士臣即由瑞州奔喪回里 上諭內閣曾國藩見丁父憂業經降旨賞假三月回籍治喪所帶湖南兵勇暫交其弟曾國華管帶惟曾國華職分較卑仍須有大員統帶方能得力所有曾國藩前帶水師兵勇著派提督銜湖北鄖陽鎮總兵楊載福就近統帶廣東惠潮嘉道彭玉麟協同調度該侍郎即假滿後著仍遵前旨即赴江西督辦軍務以資統帶○諭軍機大臣等前據廣東奏曾國藩見丁父憂當經降旨令該侍郎回籍賞假三月治喪見在曾國藩即由瑞州回籍福興文俊何人前往瑞州接辦軍務福興原擬往勸撫建一路今是否另派大員帶兵前往撫建抑該將軍仍自行前往務須斟酌盡善不可顧此失彼至曾國華本係降服著傳諭該員仍遵前旨暫留江西管帶兵勇歸楊載福等調度俟曾國藩假滿回至江西再令回籍其水師軍營所需糧餉最關緊要著文俊設法籌辦並咨照官文胡林翼一體籌撥接濟毋使缺乏楊載福

駐紮九江屢獲勝仗今命就近統帶曾國藩一軍聲勢必能聯絡著即與彭玉麟協力同心督兵剿辦以期克復堅城肅清江面將此由五百里各諭令知之○甲寅諭軍機大臣等福興等奏籌辦攻守情形並王懿德等奏江右逆匪竄擾七陽鉛山等縣調撥兵勇防堵崇安各一摺逆匪窺伺廣信已非一日該郡爲江西全省藩籬且係接壤閩浙之路該將軍見已帶兵赴剿擬請飭調張從龍之兵聽候調遣先保東路要區再圖規復他處所籌向合機宜惟閩省崇安縣屬分水等關距鉛山甚近光澤縣黃石口村莊已被該逆焚毀聯甲兵勇已駐鐵牛關且內地敗匪復在建陽書坊一帶嘯聚內外兼顧兵力不敷雖經王懿德等另調各標營官兵一千名並募漳泉壯勇各五千名令署總兵懷塔布帶往崇安駐紮而邊防喫重所有張從龍等兵勇已經該督撫飭令固守杉關兼辦鐵牛關防務其續調赴江援剿之福甯漳泉兵勇一千六百名亦據該督撫截留堵禦此時自難調往廣信本日復據晏端書奏稱廣信存城兵勇尚有八千名足資堵剿是以令饒廷選駐紮玉山防堵福興抵廣信後如有可用之兵著酌量調撥或由貴溪七陽鉛山等處相機進剿冀與閩兵會合王懿德等亦須飭令懷塔布等一面嚴防本境一面隨剿隨進俟福興帶兵行近建昌即行會合不復區分畛域殊守閩疆至江西逆勢方張福興已赴廣信曾國藩於拜摺後即行回籍瑞州一軍見派何員接辦抑止雷曾國華統帶著文俊妥籌辦理隨時具奏將此由六百里各諭令知之○乙卯諭軍機大臣等王慶雲奏南陽等處被水災民請籌賑恤一摺河南省上年被蝗春雨復未優渥糧價昂貴據聞南陽一帶饑民至以樹皮充食該處本多逆匪恐其乘機裹脅且襄樊匪徒見竄內鄉淅川尤虞勾結滋事上年該省辦賑碾動倉穀四萬石據英桂奏散放以後尚須留爲今春青黃不接之時酌量放糶卽著英桂等體察情形所有南陽一帶災荒較重之區速將此項餘贖倉穀散放接濟惟災區較廣深恐不敷並著督飭該地方官等勸諭紳富協力捐貲源源賑濟以期弭患未萌將此由四百里諭知英桂並傳諭布政使英榮知之○丙辰諭內閣綿洵等奏剿匪獲勝首犯投誠並官文胡林翼奏勦辦襄陽匪徒情形各一摺湖北匪徒劉向義等自荊門州被剿後竄踞南漳縣屬武安堰地方二月十四十五等日經知府唐訓方帶勇追剿殲斃七八百名逃散無數自十七日至二十日副都統銜巴揚阿帶兵踵至四面圍攻復斃匪眾無算該匪等窮蹙無路於二十三日率眾投誠業經綿洵等委員察看係屬實情著准其分別辦理所有被脅難民卽行妥爲遣散投誠各犯歸入巴揚阿營中隨同打仗立功贖罪其未經回籍各川勇並著分起委員妥爲押解毋任再滋事端見在穀城等處另股匪徒尚未盡淨著官文胡林翼卽飭巴揚阿唐訓方等實力進剿趕緊肅清並會同陝豫官軍合力接捕盡絕根株毋畱餘孽○諭軍機大臣等前因正陽關情形喫緊諭令勝保酌撥兵勇數百名往援或令袁甲三酌帶兵勇前往本日據袁甲三馳奏霍邱股匪直撲正陽關並有李兆受帶領粵匪由正陽關竄圍壽州雖經官軍疊次擊敗該匪等尚在城外盤踞等語是該處匪蹤延蔓實爲可慮袁甲三自係尚未奉到前旨惟此時情形緊急著卽馳赴正陽關督同金光筭等實力堵剿並先將竄往壽州之匪迅速掃蕩以免該匪等南北勾結亳州鄧家園等處剿辦亦屬緊要袁甲三南下後深恐兵力單薄著英桂勝保添派兵

勇赴毫協同朱連泰進攻俾得速行肅事至正陽關壽州等處均屬皖境福濟身任巡撫不得因派委有人竟以諉之豫省此時如有兵勇可撥著即派撥前往會合袁甲三金光節所帶兵勇實力攻剿毋得稍有膜視將此由六百里各諭令知之○袁甲三奏捻匪起事之初本非叛逆亦非敵寇不過鄉里光棍意氣爭強因而號召無賴倚爲爪牙久之窮民趨附聲勢恣意搶掠或擇肥而噬或冤讎相報漸致橫行無忌不得不興師動眾示以兵威又或兵力偶挫兇鋒愈張或辦理失宜誅戮太甚該匪等自知罪在不赦不甘待斃每一交仗勝則附從益眾敗則死黨益堅迨至蹂躪之區村落成墟無可掠食又不得不分赴完善之地焚搶搜括使夥黨有利可圖不至離散此所以東奔西突日久未能掃除也臣查自古用兵殲厥渠魁脅從罔治非徒施寬大之恩也治亂民如治亂絲未有不爲分辨而能得其條理者從前嘉慶年間三省教匪作亂用兵七八年疊奉 上諭逾格施恩曲爲寬宥人心始獲安定今捻匪滋事合計三省兵力斬擒不下十萬草薶禽獮不可勝誅在事諸臣非不出示曉諭勸令改過投誠其中畏法悔罪者亦復不少惟既已陷於賊中深恐官雖不究而被害之家必將尋讎殺戮未奉恩綸終懷猶豫可否籲懇 天恩明降諭旨除張落刑冀得等罪大惡極必須設法斬擒以彰天討並聚眾抗拒者仍須一意剿捕外其被逼入夥者或殺賊立功或自拔來歸一概准予自新並不究其既往庶無歸之民各有生路賊勢日孤人心日定化莠爲良似亦蕩平之一助也得旨汝此奏自係實情剿撫固應隨時相機辦理惟目下尙非其時須俟大獲勝仗後必應降旨若見在止博寬大之名倒懸者未解徒長梟獍之兇餘非計之得也○子湖北傷亡協領德廉祭葬世職○丁巳諭內閣福濟奏因病懇請開缺專辦軍務等語安徽省自和春調往江南鄭魁士復經獲咎福濟以巡撫督辦軍務責任自重況見在賊勢踴張屬邑被陷軍務與地方公事均係緊要何得輒請開缺致負委任所請著不准行○諭軍機大臣等前因皖省無爲州城被陷卽諭官文等分兵一千名赴廬助剿嗣因桐城兵潰廬州喫緊復經諭令官文等將前調官兵一千名迅速派往並諭晏端書鄧紹良就近酌撥兵一千名或數百名渡江繞道赴廬州軍營聽候福濟調遣本日據福濟奏逆匪大股衝撲柘皋我軍迎擊失利柘皋距廬止數十里孤城危急已在呼吸之間等語該處需兵情形實屬萬分緊急前諭官文胡林翼派調之官兵一千名無論刻下業經啟程與否著再添派官兵一千名並派得力大員管帶由黃州至宿松太湖一帶馳赴廬州軍營交福濟調遣至前諭在甯國軍營酌撥官兵一千名並著晏端書飭令迅速馳赴廬州藉資援救毋稍遲緩另據福濟片奏藩司畢承昭前在浙江措交浙海關賠款銀二千二百九十兩零見因皖省緊迫擬請解皖捐助軍需所有浙關賠項該藩司已在廬州糧臺呈繳卽可扣抵欠撥皖餉著晏端書查明畢承昭在浙措交賠項銀兩迅速派員解赴廬州軍營以應急需將此由六百里加緊各諭令知之○諭福濟奏壽州被圍緊急請飭勝保迅督大隊赴援一摺逆匪擁眾數萬由正陽進逼壽州四面合圍情形萬分緊急雖經福濟由廬州撥兵堵禦惟逆勢方張恐兵力難資抵禦勝保此時正在北路剿辦捻匪北路藩籬亦關緊要能否分身前赴壽州殊未可定著英桂勝保迅卽籌商如勝保可以帶兵前往卽行酌帶兵勇馳往救援如一時未能兼顧亦

應派兵助剿不得因其地處淮南稍存畛域之見昨有旨命袁甲三前赴正陽督同金光飭進剿正陽距壽州不過數十里袁甲三帶兵前進即可先解該州之圍以扼淮河南北要衝至柘皋防兵失利退守失塘關廬州門戶已失前調湖北皖南兵各一千名本日已降旨飭催並諭湖北再添調一千名由宿松太湖一帶赴皖其德興阿和春營中兵勇前據奏報實已無可抽撥所有江北派出之官兵五百名早已抵廬丹陽派往之官兵八百名即著福濟趕緊催提以資攻剿所請飭催餉銀之處已據戶部疊次飛催矣將此由六百里加緊各諭令知之○安徽巡撫福濟奏軍務摺報仍令鄭魁士會銜得旨汝於該鎮忽參忽保迄無定見云伊度越諸將則身任封圻者能無愧乎見未便明降諭旨又派伊統帥非為汝惜實為大局所關也○復安徽桐城陣亡已革總兵官郝光甲諭予祭葬世職諡武節○子安徽殉難訓導夏濟川等湖北殉難司獄陳惟和祭葬世職○已未諭內閣英桂奏襄樊土匪闖入內鄉縣城經官兵會同克復一摺二月十七日襄樊土匪竄擾內鄉縣署知縣楊鏞帶勇出城迎擊賊已分股竄入縣城總兵邱聯恩等合隊進剿該匪出西南兩門抗拒我兵槍礮齊施斃賊甚多匪眾往西北敗退我兵追擊二十餘里該匪等開北門逃竄立將城池克復見在餘匪回竄楚境著邱聯恩乘此聲威迅速追捕究剿殲茲醜類勿留餘孽著內鄉縣知縣楊鏞有無棄城逃避情事並在城文武各員弁下落著英桂查明具奏○諭軍機大臣等英桂奏嵩縣匪徒竄擾見籌剿辦等語據稱嵩縣所屬龍王廟一帶突有匪徒豎旗訛索錢文經官兵往捕膽敢在汝泗鎮等處放火焚燒聚眾抗拒該處係完善之區豈容匪徒肆行焚掠亟應及早撲滅以靖地方著英桂嚴飭河南府知府樊瑛認真督剿迅獲首犯解散脅從毋任蔓延為患見在內鄉股匪業經擊退邱聯恩等勦辦竄匪如已得手亦可酌量抽撥兵勇以資進剿惟豫省兵力較單該縣逼近陝境即著督臣劉坤一酌派兵勇會合豫兵前往勦辦並飭所屬整頓團練勿令匪蹤越竄勝保督辦固始擒匪已解城圍見在潁州擒眾屯聚勝保由烏龍集進剿正可先將潁郡擒匪勦除遏其北竄至壽州被圍雖經福濟派兵往援但兵力甚單恐難濟事前令袁甲三往正陽是否能策應壽州抑須再添兵勇助剿方能得力著英桂勝保迅籌妥辦見當捻勢張又有句結專匪之說該撫等務當督率皖豫官兵聯絡一氣毋分畛域以期迅速奏功將此由六百里各諭令知之○諭前因廬州賊眾兵單餉需缺乏當諭晏端書迅撥南軍營官兵一千名赴廬救援並著撥銀四五萬兩以資接濟茲據該撫奏稱皖南三衢同時告急自顧不暇兵力已無可籌撥自保實在情形惟餉銀毫無接濟豈得謂之不分畛域見在廬州缺餉危在呼吸浙江近在鄰封若坐視其餉竭兵潰大局攸關何堪設想該撫於省局籌餉則豫為之謀於鄰封則涓滴莫及何氣習之深若是著晏端書竭力設法量籌接濟迅解廬州不准藉詞推諉致滋貽誤將此由六百里諭令知之○諭江南軍務從前張國樸與福興共事尚能迅解金壇之圍乃自和春到後數月之久句容一邑尚未克復是否和春與張國樸意見不合以致該鎮未能用命軍營統帥全在能得人心懾駕馭無方健將不肯出力貽誤非輕怡良近在常州必能確有見聞著即確查密奏至余萬清收用劣員盧應翔經和春奏請撤去幫辦軍務業已降旨允准惟余萬清攻剿鎮江如果不能得力

該大臣早應據實參奏何以因收用盧應翔一節輒請撤去幫辦恐和春因該員別有劣蹟遇事而發著怡良一併密行訪查如余萬清平庸著該督會同和春於江南軍營察看何員可以接辦鎮江軍務酌保一二人速行奏聞候旨更換再本日崇恩奏豫籌防護海運事宜一摺據稱近年滋事洋盜皆係閩廣艇匪若能於余山一帶扼據險要盜匪斷難北竄等語本年海運漕船已據該督等酌定章程募雇勇船在洋巡緝並有輪船分別駐泊著即嚴飭該員弁務於余山五條沙一帶巡防扼守毋令閩廣匪船乘間北竄並遵照成案令護漕師船至東省石島洋面交替明白再行南下俾南北水師均有責成庶不至稍有疏失將此由四百里密諭知之○辛酉以克復甯國府城復道員鄧瀛職免知府顏培文罪均畱任效力○壬戌諭內閣和春奏攻剿溧水連奪賊壘大獲勝仗一摺江南溧水賊匪經官兵屢次痛剿勢已窮蹙二月初七日賊由烏山曹村一帶來援和春派令副將魯占鼐等奮力剿殺斃賊百餘名金陵安慶大股賊匪竄至鄔山築壘傳振邦督同馬步分路進攻並於山後埋伏賊匪五六千人分股迎敵兵勇且戰且卻佯敗誘賊都司鄧聯科等伏兵齊出逆匪大股奔逃我軍乘勝追剿斬賊甚眾二十日賊匪復過河築壘二座和春派李定太等分途齊進賊匪約三四十人出巢迎敵周天培等帶兵搶至外壕槍礮連環火箭噴筒齊發賊眾驚潰立將賊營四座奪獲餘匪奔逃退至河濱落水者不計其數兵勇搶至河岸又斃多賊復將鄔山五座賊壘奪獲賊向柘塘逃逸所有該處賊營一律踏毀共計奪獲賊壘二十六座斃賊三千餘名該逆負隅死守著和春即督飭在事文武員弁迅將城池趕緊克復毋得再事遷延致干重咎○諭軍機大臣等御史毛昶熙奏山東省城被災較重請飭查辦賑濟並稱該省於咸豐四年曾買雜糧六萬餘石爲守城之儲至今仍存省城可撥爲賑恤之用又聞該省上年開捐賑局共存銀三十一萬餘兩除用過外尙存二十五萬餘兩亦可酌撥賑濟各等語東省連年被災曾經發帑賑濟誠恐不能備及且閱時已久民間生計更難自應酌籌調濟該御史所稱糧石銀兩是否確存實有此數著崇恩卽飭查明酌量動用就被災較重之區辦理賑濟以恤民艱並著一面奏聞一面先行籌辦用副朕惠愛黎元至意將此諭令知之○諭和春奏攻剿溧水連奪賊壘並句容鎮江獲勝情形各摺片江南軍務自紫荊山大營失陷向榮病故後金陵城外遂無大兵控扼句容溧水不過最爾小縣該逆以之牽掣我軍而分其黨與四出滋擾現在安徽省集無舒六相繼失陷賊蹤距廬州僅止數十里情形萬分喫緊池州蕪湖之賊窺伺徽甯浙防又形喫重由大兵不能進逼金陵故且逆得以安居城中從容布置賊勢裹脅日多幾致官兵應接不暇見當各省荒旱兵餉缺乏日復一日伊於何底和春前在安徽督師得力張國樞在江南軍營亦素稱奮勇何至區區小邑曠日持久不能攻克本日據奏溧水之戰擒斬尚多句容之戰仍未見得力著卽督飭將士謀勇兼施先將兩城攻下以便移師金陵使該逆有所顧忌稍戢其猖獗之形而我兵不爲句容溧水牽掣亦可分援安徽等處以期次第廓清毋得再事遷延貽誤大局將此由六百里諭令知之○癸亥祀先農親耕藉田○諭軍機大臣等前據福濟奏請由湖南撥解米石當經諭令駱秉章酌量籌辦茲據奏稱湖南省上年早歉米價日昂買米四萬石需銀八萬兩合之水陸運腳共需銀



十六七萬兩且自蘄州至六安需用人夫八萬名亦斷難於招雇各等語自係實在情形惟皖省缺乏米糧甚關緊要昨據英桂奏稱前次運送皖餉米麥六千石行至潁州因捻匪竄踞三河尖河路梗塞見將米石起存阜陽縣倉尙未運解此項米麥亦可藉濟急需本日業經諭知英桂設法解至廬州著福濟即行派員前往迎提以資兵食所請飭令勝保由正陽進剿六安之處亦已諭知英桂勝保酌量辦理廬州情形喫緊前諭調之皖南官兵已據晏端書奏稱一時未能分撥湖北軍營已派臬司李孟羣帶兵一千五百名赴皖助剿該撫卽督同鄭魁士妥爲布置協力堵禦奏定三已有旨令其統領原帶貴州官兵前赴和春軍營隨同剿辦矣將此由六百里諭令知之○福濟鄭魁士奏據署廬道金光筭稟稱二月十九日賊船數百號賊馬數百匹向西北撲來城上開放火槍擊斃馬賊六名賊旋退回二十日該逆擁眾由南關攻城該署道會同遊擊成桂等督飭署壽州知州黃元吉署鳳臺縣知縣李霖統率兵勇由西門出城繞出賊營該逆迎拒經勇目李士申等及壽州營兵奮擊刺斃賊數百名斬首五十餘級焚毀賊營七座二十一日該逆由東門外盡擁而來我軍開礮轟擊當斃馬賊數名步賊數十名賊不敢進遙聞東北十餘里外槍聲不絕係團練姚紹孔擬在該處築壘遇賊接仗其北門外四頂山忽見黃旗徧插恐賊紮營卽令李霖督飭勇目朱在國縋城衝擊該逆東遁二十二日以後該逆更番攻城徹夜衝突間用雲梯爬城並皆擊退至二十五日被圍已歷八晝夜外援未到姚紹孔練勇亦潰因商同各文武挑選舊勇出城血戰一面暗約鄉團在十里外放火喊殺二十五日夜調齊兵勇衝出東門各鄉火光四起該逆不知虛實疑我援兵猝至內外夾攻倉皇失措棄營狂走互相踐踏死者不計其數該署道等追剿二十餘里計斃賊三千餘名割獲首級六百餘顆城圍已解等情查壽州係淮南重地該城僅以數千兵勇支撐八日之久非謀勇素裕斷難保此危城金光筭等激勵軍民同心守禦出賊不意暗布奇謀遂令逆鋒頓挫立解重圍實屬識力過人賊雖回竄正陽該署道業經追剿惟逆眾數萬非孤軍所能支持應懇飭催勝保督帶大隊由正陽進剿六安與皖軍會合方能廓清餘孽等語駐守廬州三面皆賊竭力守禦勉強相持斷難他顧如勝保能剋日抵六藉分賊勢當可轉危爲安上諭本日據福濟等奏壽州城圍已解請飭勝保由正陽進攻六安以分賊勢等語勝保見由烏龍集回勦頑匪諒如該處股匪漸次掃蕩可以無虞北竄自應徑趨六安會合皖軍藉分廬州賊勢廬州三面皆賊情形甚爲喫緊福濟兵力甚單必須速爲援應著卽與英桂妥速籌商酌量辦理袁甲三接奉前旨是否已赴正陽見在壽州既無須助剿能否卽由正陽馳赴六安分剿粵逆亦著英桂等妥商速辦前據英桂奏籌解皖省米麥六千石因三河尖河路梗塞尙存阜陽縣倉見在廬州待米甚殷著英桂卽將前項米麥設法速解廬州以資接濟再據御史毛昶熙奏河南光州一帶饑民乏食至掘食草根樹皮請籌撫恤等語該處偏近匪蹤饑饉頗連已堪憫惻愍慈惠事尤屬可虞著英桂卽行籌款酌量賑恤毋使流而爲匪將此由六百里各諭令知之○以紳民勦賊出力永廣湖南新甯縣文武學額各三名○以壽州守城出力賞道員金光筭按察使銜知州黃元吉花翎○甲子論軍機大臣等昨有旨令奏定三帶貴州官兵前赴江南隨同和春攻



期本日據奏定三奏已與福濟會商帶領吉林馬隊及陝西官兵由臨淮水陸並進疏通餉道相機進剿等語見在廬州二面皆賊勢成坐困所恃以通餉道者惟在臨淮一路即福濟前奏亦稱逆匪若由六安直抵臨淮則軍火糧餉無路可通是保全臨淮實關廬州大局該提督見既帶兵前往即著暫留臨淮一帶俟剿辦略有就緒再行前赴江南前據長庚奏籌辦米二千石解赴臨淮轉解皖省嗣復諭令邵燦等速備米一二千石解往諭令怡良於截漕等項下籌款解皖必從淮河經過即著奏定三督飭兵勇將淮河北岸匪蹤隨時剿辦妥為護送該提督營中所需糧餉即可於此項銀米經過之時酌量截留以資接濟其餘銀米仍派兵解赴廬州毋稍疏失至請由北路添兵助剿之處此時實無可分撥勝保見在潁州剿匪儻彼處得手自可馳赴六安會剿正陽一路與臨淮聲息相通已令袁甲三帶兵前進俟到關後即可與該提督合力進剿徐泗各路兵勇相距非遙亦可隨時知會互為聲援也將此由六百里各諭令知之○丙寅諭軍機大臣等福興文俊奏兵力不敷請添調北路勁旅一摺江西西路各城圍攻正緊惟東路空虛特甚該將軍所擬力保廣信分攻撫州自係要著惟北路勁兵分調已多此時實無可抽撥湖北水陸兩軍在九江者數幾二萬既據福興咨商官文等於李續賓所帶兵勇內分撥數千名即著官文胡林翼斟酌速辦如九江即可克復固應分兵接濟若攻克需時亦應移緩就急酌量抽調據該將軍擬先赴瑞州再回廣信兩處相距不遠誠恐東路策應不及著於行抵瑞州後即由梅港東鄉一帶節節進剿直抵廣信以固閩浙藩籬瑞州營中有無可分之兵或酌量帶往亦著妥籌分撥但不可顧此失彼致西路又形單弱南昌省城見存會國藩兵勇尚有若干能否分撥前赴撫州亦著福興等酌量辦理再前據晏端書奏廣信存城兵勇不下八千名福興前赴該郡亦可就近調撥分投剿辦至所請由浙協撥兵餉雖經諭令晏端書酌籌銀兩陸續解赴廣信惟浙江撥解皖南廬州等處軍餉數已不少恐即勉力支應為數斷不能多文俊統轄全省不應一籌莫展專恃仰給鄰封著即督同藩司妥為籌畫以資接濟毋得坐誤事機將此由六百里各諭令知之○諭福興奏軍餉久缺仍請飭浙省接濟等語福興一軍餉需前據何桂清奏稱該將軍過浙時曾先後籌銀六千兩應付並聲明以後艱於籌撥應由江西省地方官支應自係為皖南等處籌辦防堵需餉較鉅勢難分撥茲據福興奏賊眾軍疲事處萬難不得不仍請浙省協濟亦屬實情且該將軍見須由省前赴廣信該處為浙省藩籬尤應就近接濟即以自固疆圉著晏端書不必拘定按月若干之數酌量籌撥陸續解銀數萬兩至福興廣信軍營毋得心存膜視致誤事機將此由五百里諭令知之○丁卯命文俊來京以耆齡為江西巡撫龍啟瑞為江西布政使副使通政司○己巳子安徽陣亡參將師長鑑祭葬世職○庚午諭軍機大臣等英桂勝保奏進剿逆捻獲勝情形各摺片捻匪大股肅聚水溝集經勝保督兵奮擊疊獲勝仗惟該匪死黨尚多兵力不能分撥自應由西北節節進攻以期漸次肅清勝保見在進攻柳溝侯柳溝一破即進擣三河尖目前賊勢自應如此辦理該逆奔突靡常軍情旦夕不同必須相度機宜統籌全局英桂見由新蔡進紫阜陽縣之驛口橋如勝保剿辦得手仍須移營前進總期聲勢聯絡互相策應方為妥善壽州雖已解圍潁上一帶尚當喫緊見在大同馬隊

吉林餘丁業已到營俟直隸官兵到後卽一面進攻一面分兵應援願上袁甲三如不能前進正陽亦須分兵策應著英桂等體察緩急情形毋得顧此失彼致有貽誤將此由六百里諭令知之○辛未諭軍機大臣等恒春奏滇省回夷各匪滋擾剿辦正當喫緊帶兵將領乏員見署鄧陽鎮總兵王國才熟悉滇省情形同民畏服請飭該署總兵迅速來滇協剿等語湖北水陸各軍均已乘勢東下王國才正在黃梅小池口一帶剿賊自係帶兵得力之員惟滇省剿辦回夷各匪尚未得手較楚省尤爲喫重著官文胡林翼卽飭該總兵前往滇省交恒春調遣藉資熟手將此由四百里諭令知之○諭胡林翼奏軍餉缺乏請飭山西等省按月籌解等語湖北水陸各軍併力東下關緊剿匪全局襄陽等處征兵亦須士飽馬騰以期速行歲事見在該省年歲荒歉米價昂貴官兵欠餉五六月不等軍中僅以糜粥度日情形實屬窘迫該撫請飭山西陝西四川廣東各按月籌銀五萬兩解往以資散放自應亟籌協濟山西陝西四川三省撥解楚餉會據該督撫等陸續奏報惟楚省需餉較鉅仍著吳振斌王慶雲會望顏竭力籌措源源接濟縱不能如按月五萬兩之數亦須每月撥解數萬兩俾供支放至廣東省於奉撥楚餉並未將解過數目奏報此時需餉甚急著葉名琛先行撥銀數萬兩派委委員迅速起解嗣後仍著按月籌撥毋得稍涉推諉致誤要需將此由五百里各諭令知之○以湖北剿賊出力予候補同知李續宜等加銜升敘有差○予雲南陣亡同知鄭自耀等祭葬世職○壬申諭軍機大臣等和春奏軍餉緊迫請責成江蘇督撫籌辦並請催各省撥款一摺所有山東河南廣東等省撥款已降旨飭催並諭怡良趙德轍無論地丁關稅捐項實力妥籌源源接濟矣和春軍營每月需餉至四十餘萬之多江蘇雖財賦之區見在止有蘇松二府尙屬完善上年又遇災荒正項錢糧既多獨緩關稅亦未能暢旺力有不逮亦係實情上年經和春參奏當卽嚴飭籌款接濟旋據該督撫奏稱解銀三十五萬兩至大營糧臺其餘十五萬兩分給鎮江各營年內得以敷衍又三月之久自應續籌接濟惟一隅之地勢難責其供給全軍和春前在安徽該營兵餉皆由外省協撥並非安徽一省所能支應近日廬州缺餉亦諭江蘇督撫籌濟總因用兵處所日多一日需餉日少一日爲今之計惟有早克一城卽可省一處兵勇爲籌節糧餉之上策和春自到江南旬容深未見克復一城而兩次參劾督撫恐其誤信小人之言以致文武不和有誤大局朕既重任和春不得不加之訓諭卽如怡良久任封疆老成歷練近因年衰多病屢經該督自陳趙德轍初任巡撫尙少諄練朕亦深知何桂清實心任事因病開缺病痊仍當畀以重任督撫大吏朕心自有權衡也至於統兵征剿乃和春專責著與張國樑協力同心早克兩城使附近地方漸臻安堵則徵收捐輸皆易爲力至江蘇勸捐各府各有紳董會同地方官承辦四年以來民情尙屬允協和春前派常州紳士趙振祚等各員前往蘇松勸捐恐本地紳董轉得藉口卸責於事無益總兵谷韞琛籍隸山東於蘇省情形更不相習本日已諭知怡良趙德轍責成本地紳士會同地方官妥爲勸諭所有和春前派各員並著毋庸前往將此由六百里諭令知之○諭卽因江南大營兵餉缺乏諭令葉名琛等將廣東省月濟江南餉銀十萬兩山東河南兩省應撥江南餉各五萬兩迅將籌解並令崇恩於京餉項下劃解銀十萬兩未據該督撫等覆奏本日

據和春奏大營兵餉欠至四月有餘兵丁時有鼓譟情形急迫請飭催協餉以資接濟等語該營餉需較鉅本省解款不敷支放全賴各省協濟葉名琛等於奉撥各項未卽報解自因本省用款較多一時未能兼顧惟江南一軍關繫東南大局見在既有餉竭兵潰之虞急應設法籌濟著葉名琛將月濟江南餉銀並上年欠款迅速設法陸續撥解山東省應解銀五萬兩除去年解過一萬兩外尚短銀四萬兩並京餉項下劃撥銀十萬兩河南省應解銀五萬兩著崇恩英桂遵照前旨分別籌解該督撫等務當悉心籌畫毋得稍涉推諉致滋貽誤將此由六百里各諭令知之○論本日和春奏兵勇缺餉日多請飭趕緊設法籌撥一摺江南各營兵勇每月須餉銀四十餘萬兩前經諭令怡良趙德轍源源接濟嗣據奏稱年內湊撥大營糧臺銀三十五萬兩其餘十五萬兩分給鎮江等各營僅得敷衍度歲此後需餉尚多不可不認真籌畫設法辦理除截留漕米羅價儘數撥給外所有地丁及江海關稅並海運經費抽釐各項著該督撫一併湊解無誤要需至蘇省年歲荒歉正款無多不得不剴切勸捐借資民力該省勸捐本係各府紳董承辦民情向屬相安上年和春另派谷韞琛等五人往蘇松二府勸捐恐本處紳董轉得藉口卸肩而伊等人地生疏究屬隔膜已論和春毋庸派辦以後仍著該督撫責成該地方官會同本地紳董妥爲勸諭接濟和春大營江蘇藩司何俊是否年老難勝繁劇之任當此錢糧支絀之時必資精明練達之員方足以資籌畫而裕經費著怡良趙德轍查明該藩司如不勝任卽一面具奏一面撤任毋至貽誤將此由六百里諭令知之○論本日據文俊奏江西軍餉支絀請飭四川協濟一摺江西剿賊正當喫緊四川見係完善之區雖調撥軍餉不僅一處自應竭力籌撥以顧大局著吳振斌設法籌款每月撥解江西餉銀數萬兩以資接濟毋誤要需又據樂斌奏請飭川省變糶常平倉穀共有一百二十餘萬石若按照例價每石羅銀五錢五分計可得銀六十餘萬兩所羅價銀解部設局收買米石見在京師米價昂貴倉儲短絀兵民粒食維艱自應寬爲籌備惟此項米石囤積日久恐不免有黴變之虞著卽迅速查明趕緊設法籌糶備爲數不敷並著於濟社二倉內存穀羅變湊足五六十萬兩之數派員解赴京師以資收買將此由四百里諭令知之○文俊奏查饒州北界彭澤都昌東鄉祁門建德逆匪環伺防兵又單上年十二月間鄂省敗匪萬餘自都昌闖入鄱陽之泥灣等處經都司畢金科等往剿該逆竄往浮梁縣景德鎮並有安徽敗匪七八千由祁門亦竄至浮梁縣署知縣楊錦帶勇堵剿先勝後敗逆匪遂先後由樂平萬年安仁等縣竄入撫州餘尚占踞景德鎮正月初二日畢金科因浮梁縣約會夾攻於初四日抵鎮而浮梁勇尚未齊畢金科卽率本營進剿分派千總李飛龍等由各巷口衝入自帶哨官李克封等由正街進詎伏賊四起鏖戰逾時竟致潰敗畢金科力竭陣亡饒郡大震駐防各勇潰散餘俱移紮角山前十八日署饒州府知府馮詢移請駐防餘干之都司林保赴郡協剿二十三日千總陳開榜尋獲畢金科屍身正收殮聞聞大股賊匪由四十里街來撲郡城林保卽帶勇迎剿賊匪已自北門撲入林保督隊堵截砍倒執黃旗賊目二名直入賊陣左右衝突殲斃十餘名賊匪四面合圍林保身受三傷幸哨官時連科等馳至合力抵禦殺賊數十水師礮船開礮擊斃無數賊敗退屯聚油墩一帶此皖鄂敗匪分竄各屬情形也廣信

府屬之貴溪縣毗連撫建饒州調撥知縣李元度帶勇守禦撫州賊匪屢擾貴溪縣之上清應潭及安仁縣之鄧家埠均經李元度擊退正月二十一二等日另股賊匪四五千復由景德鎮竄過萬年將赴撫郡李元度即飭彭斯舉等帶隊於二十三日赴安仁截剿逆匪見官兵已至旋即折回萬年二十四日竄擾貴溪之百丈嶺一帶李元度飛調彭斯舉等同回一面派吳修敬等帶隊放哨丁家坊之賊即退回三板橋二十五日該逆改竄弋陽縣彭斯舉等督兵進剿弋陽縣知縣善普率勇嚮導路遇放哨賊六七十八人悉爲我軍所殺附城屋內有賊百餘復圍殺大半黃兆霖等乘勢直衝入城遇賊即殺逆黨數千三面包出黃兆霖爲火彈燒傷與彭斯舉等突圍而出是日三板橋續到賊二千餘李元度隨將彭斯舉等調回堵禦該逆亦併歸弋陽彭斯舉等跟蹤追擊普及同城文武亦率團來會其先到弋陽之賊已搭浮橋過河後到一股尙踞弋邑彭斯舉等自北門進攻賊正過河截殺七八十人賊爭趨浮橋擁擠落水者不少對河賊黨情急將浮橋拆斷未經過河之賊復被我軍殲斃多名餘賊竄往黃土港而去當將縣城收復二月初一日該逆竄擾河口鎮經署同知孫家鐸等於三更時進剿該逆不知我軍多寡即望鉛山奔竄沿途追殺十七名初三日該逆冒雨來撲鉛山北門署知縣陳汝楨等開礮堵禦不意西門城牆雨後鬆塌逆匪即由缺口衝入數十人縱火焚毀衙署陳汝楨等趕往撲救值外委李化龍自河口趕到逆匪疑爲援軍遂即退竄約殺賊四十餘人該逆旋竄鉛山之弋陽邊界之吳坊一帶並窺伺閩省之雲際關被該處兵勇擊回俱覓往建昌而景鎮地方於初九日又到股匪數千擾及貴溪萬年餘千一帶此信郡各屬被擾情形也道員劉于濤上年駐兵樟樹十二月初二日派蔡康業等陸勇及康國器等水師擊沈賊划淹斃賊匪二十餘名初三日臨江之賊來犯亦爲擊走復探得三溪館地方有賊千餘營盤四座劉于濤親率兵勇進剿殺賊焚壘連日復率水師及平江勇攻破銅鑼地方賊營三座斃賊五百餘人三十日臨郡賊匪來撲我營劉于濤令何堯臣等分路迎敵平江勇楊三保首砍執黃旗賊一名賊勢稍卻各軍馳剿該逆自相踐踏死傷甚多直追至臨江城下而還正月十二日復派平江勇數百名赴蛟湖接仗失利幸經水師截住賊不敢追十九日探聞撫州賊匪合院鄂賊約數萬人赴援瑞臨劉于濤即派李逢春等各帶礮船赴新淦截擊逆匪擄得民船百餘號欲渡我軍開礮轟擊賊即紛紛上岸追逐三四里將被擄民船奪回二十一日離樟樹十五里之香溪地方有賊數千劉于濤乘其遠來立派羅玉祥等疾馳進剿該逆不戰而遁追殺數十人是日又有股匪數千竄撲豐城劉于濤即帶領礮船助剿鏖戰二時賊始敗退二十三至二十七等日逆匪數千竄至距樟樹二十里之潭埠地方屢次竄撲均經水陸各軍先後擊敗二月初三日探知黃竹巷地方有賊數千劉于濤即令水陸各軍進剿初五至十四等日擊敗來援沙湖股匪攻破蕭公廟賊營遂併力齊攻香溪賊眾膽落盡望新淦竄去此樟樹豐城疊次防剿情形也補用道劉長佑知府蕭啟江克復袁州後劉長佑收復新淦進攻臨江之西蕭啟江先剿上高進攻臨江之北蕭啟江行抵上高縣之漢塘地方營賊分股來撲蕭啟江開營縱擊敗之進攻上高縣城該逆鼠竄收復城池搜剿官盤地方焚毀偽監軍傅家淦巢穴進攻陰岡嶺各路獲勝斃賊數百名落水溺

斃者無算連聞臨江有賊數萬分萬餘至陰岡嶺撲營湖坊及到公廟各來大股勢如潮湧蕭啟江令蕭啟淮等分投迎剿慶戰四時殺賊六百餘人生擒數十名餘匪敗竄二月初八日臨江逆匪二萬復分路來犯蕭啟江督同各將弁迎擊苦戰竟日殺賊多名餘賊敗匿彭家村道員劉長佑一軍敗賊於陽岡探聞撫州來賊四五千與臨郡之賊三千四廬聚羅坊劉長佑率隊往剿賊列陣於羅坊前後不下萬餘人劉長佑派各營前後鈔剿劉坤一等匹馬衝突各勇奮力直前再按再厲街後之賊先敗街前之賊隨亦沿河潰走追殺二十餘里共計斃匪四百餘名生擒十五名是日即紫營羅坊並調雷防袁郡都司黃三清移守新喻本年正月初間移營太平地方俟蕭啟江兵至會攻郡垣詎意臨郡賊匪數萬撲營劉長佑正在抵禦伏賊四五千自後路突起以致各營全陷劉長佑退回新喻該逆自大坪撲營後欲悉眾來犯陰岡嶺蕭啟江一軍甚為喫重瑞州大營已抽撥湘寶等勇一千五百名策應此分攻臨江劉長佑失利退回情形也臣查劉長佑一軍挫衄退回蕭啟江駐紮陰岡嶺勢甚岌岌瑞州不得不分兵救應吉安又添援賊萬餘我軍苦戰實甚急撥兵圍攻撫建擒賊所必救既可分臨吉賊勢亦可保全廣信要區而本省急切無兵可撥前經西安將軍福興會臣奏請調外省精兵惟有靜候諭旨遵辦都司畢金科身經百戰驍勇超羣此次深入重地被害甚慘懇請飭部照遊擊陣亡例從優議卹其餘員弁應請分別辦理奏入予畢金科祭葬世職如遊擊例訓導沈其秀等祭葬世職○癸酉諭內閣怡夏趙德轍奏遵旨籌辦團練一摺前因文慶等奏請實行團練疊經降旨諭令各督撫體察地方情形斟酌辦理茲據該督等奏審度形勢分別派員管理籌辦尙屬周妥江蘇見在偏近賊氛團練尤關緊要該官紳等果能實心經理既可保衛鄉閭尤可助剿賊匪除淮安徐州二府由該督等查明邵燦庚長責成徐州道王夢齡辦理外所有裏下河各州縣及通海二州屬即著署兩淮鹽運使郭沛霖督辦江南府屬之六合江浦二縣著已革道溫紹原督辦上江句容等縣及揚州府屬之江甘儀徵等縣著各該管知府督辦常州鎮江二府屬著常鎮道喬松年會同已革臬司查文經督辦蘇松太一帶著該省臬司督辦凡有見任各官經該督撫派令督辦者均加督辦團練銜其有由司督辦者該管之道府州作為協理由委員及道員督辦者該管知府作為協理由知府督辦者該管同知作為協理均著加協理團練銜以專責成一俟軍務完竣即行撤銷該員等務當督飭州縣各官遴選公正紳耆會同經理查照原奏章程隨時考察嚴定賞罰經費則民捐民辦勿許科勒丁壯則各保各鄉免其徵調以副朕除暴安良至意○諭軍機大臣等自粵匪東竄以來江蘇省籌解大營軍餉皆取給於地丁關稅並由各省協撥之款從無貽誤見因荒歉錢糧蠲緩居多關稅未能暢旺各省撥款又因用兵之處較多以致解數寥寥見據和春怡夏等先後奏到復稱江南大營兵餉積欠四月有餘兵丁時有鼓譟之事雖經降旨嚴催廣東等省將欠解各款趕緊起解恐一時未能即到兵勇嗾噉待餉豈能枵腹荷戈若再遲延大局將不可問因思用兵禦寇原以保全黎庶且各省捐輸軍餉朕無不立沛恩施惟民力不齊為數零星又無濟於大勢咸豐四年間陝西巡撫王慶雲曾有捐借兼行之舉頗著成效不獨江蘇省可以照辦即浙省籌濟皖南江西江南等處餉需亦屬支絀如



能查照辦理除本省供支外亦可協濟江南軍餉著怡良趙德轍晏端書督同省垣紳士並派委委員分赴各府州縣會同各該紳士查明上戶若干開報該督撫即責成公正紳士婉委勸導隨時請獎其有爲數較多自一萬數萬以至十萬兩者自應分別差等逾格施恩或賞給鹽運使銜或賞給副將銜或加銜之外另賞花翎或賞給舉人一體會試均准該督撫酌量請旨以期踴躍其有力可多捐而不願請獎者即由該督撫等飭由藩司按數給與借咨印帖自咸豐八年起分年給還作正開銷仍按照銀數多寡分別建坊給扁以示優獎所派委員紳士務擇素行廉正才情幹練者分投勸辦萬不准有抑勒侵吞致滋流弊中戶以下所有見行捐輸抽釐等項仍著照常辦理毋庸另勒捐借以免煩苛地方官吏等儻敢將未經開報各戶藉端需索即著嚴參懲辦該督撫等務當各就地方情形詳加體察酌量辦理以實軍需當此用兵之際凡食毛踐土之倫各具天良必有踴躍出貲同仇敵愾者儻能積有成數即撥江南大營以資接濟庶兵無匱乏而於民生亦不至擾累將此由四百里各諭令知之○諭怡良趙德轍奏軍餉來源已竭請飭鄰省互籌協濟等語江南軍餉每月需銀四十餘萬兩本省所出每月不過二十餘萬兩見在句容大營及水陸各營欠撥過多兵勇赴糧臺喧鬧若不急籌協濟恐餉竭兵譁全局瓦解浙江與蘇常等府壤地相接即休戚相關似此窘迫情形必應於無可籌撥之中設法源源接濟藉以支持大局除昨據晏端書奏撥銀一萬兩解赴江南大營外著該撫仍遵前議自本年三月起按月協濟即不能如六萬兩之數或四五萬兩源源解往藉以安定軍心不得以無款可籌空言塞責將此由五百里諭令知之○甲戌諭內閣胡林翼奏官兵生擒匪首義樊肅清一摺襄陽匪徒高二先等被官軍疊次擊敗竄匿張家集等地方三月初五日候補道唐訓方參領舒保督兵乘雪夜行四面進攻初六日遇賊於白家集被擊反走官兵分五路星夜追剿於郭家岡地方將匪首高二先等生擒正法餘匪斃斃淨盡襄樊漸就肅清此股匪徒自上年九月滋事裹脅甚眾襄樊文武守危城胡林翼派往各員期辦迅速均屬著有微勞所有出力員弁及協剿之紳團等著准其擇尤保奏○諭軍機大臣等本日據袁甲三奏正陽賊勢稍鬆擬先清北路再行南下惟軍情緩急靡常進退難以預定亳州見乏得力將領請飭英桂於道員以上選派一員來亳駐紮各等語袁甲三見雖駐紮亳州俟北路官軍得手後即須統兵前進與勝保一軍聲勢聯絡而亳州東北一帶伏莽尚多必須明幹大員駐紮方不至顧此失彼惟河南省道員以上文員每多未經行陣深恐難期得力著英桂勝保於見在帶兵之副將參將等官中擇其堪資統領者即行選派一員馳赴亳州軍營如袁甲三統兵南下即可責令該員實力防剿以遏歸亳北路之衝將此由五百里諭令知之○丙子諭軍機大臣等將肅遠奏威甯州漢回構釁分別剿撫一摺該州爲回漢夷民錯處之地此次起釁本因滇省漢民報復回仇致宣威之回將威甯所屬村房燒毀境內回匪四起竟至圍撲州署知州周守正雖經撤任而匪勢未衰漢夷居民終懷疑忌驟議調兵回恐邀結演回釀成巨變遽行議撫亦恐漢夷民心不服且黨與既多真偽不一未必輸誠聽命見在滇省辦理漢回其誤即在專主招撫以致回匪既不畏威漢民亦不懷德該州回夷雜處辦理不得其平難免藉端生事該撫業經酌調官



兵如果該回民等悔罪投誠縛送首逆准予自新儻仍執迷不悟必當懼以兵威不可遷就了事無論回漢夷人總須論其曲直不得稍有偏袒方足折服其心仍一面剴切曉諭一面知照恒春等加意嚴防毋令勾結延蔓將此由六百里諭令知之○己卯諭內閣福濟奏攻剿壽州竄賊獲勝並攻毀枸杞園賊營等語逆賊自壽州解圍後屯聚三十里鋪支家店一帶並於正陽進東之枸杞園紮營三座經署道金光第等帶兵於雙橋地方接戰斃賊甚多練總孫家熾等各帶練兵三千名在迤南橫擊我軍乘勢急攻斃賊二千餘名該署道復於行近枸杞園地方將兵勇馬匹分路圍擊立將賊營三座奪毀追殺十餘里斃賊五六百名餘賊敗竄仍著福濟飭令該署道將竄賊分投剿擊悉數殲除俾自壽州至正陽一帶得以迅就肅清○諭福濟奏兵勇索餉滋鬧遺失關防自請嚴議一摺廬州大營湖南兵及楚勇廣勇等因該撫巡視城垣輒敢藉索餉爲詞肆待滋鬧以致該撫關防失去實屬目無法紀著福濟卽將該滋事兵勇查明從嚴懲辦並將不能彈壓之帶兵各員據實參辦以示懲儆福濟自請嚴議之處著加恩改爲交部議處並著禮部將安徽巡撫關防卽行鑄造頒給以昭信守○諭福濟奏藩司因擠跌損傷懇請開缺一摺安徽布政使畢承昭因山東兵丁索餉出堂彈壓以致人多擠跌腰骨損傷著准其開缺回籍調理所有約束不嚴之總兵嵩瑞遊擊施溥守備恩清胡運河扎拉豐阿業普崇額衛守備張際元均著摘去翎頂以示懲儆○諭軍機大臣等福濟奏皖營兵勇缺餉請飭於江南釐捐項下酌提撥解等語皖省早荒米貴無款可籌致各營兵勇索餉滋鬧勢甚危急所奏自係實情惟江南大營近據和春奏到因欠餉多月兵勇亦有鼓譟之事是江南與廬州情形同一緊迫福濟所稱江南釐金已收銀二百餘萬兩不知隨收隨放豈有鉅款存留至廬州軍餉本年各省節次報解者山西已有十萬兩陝西已有五萬兩河南九千餘兩浙江於本月奏到解銀二萬兩江蘇於本日奏到解銀三萬兩爲數已屬不少其或因道路梗塞日久未達福濟惟當派兵疏通設法迎提前進以濟急需勿使已經起解之餉阻滯附近地方自誤餉需再前據庚長奏籌米二千石解赴臨淮秦定三見在帶兵赴臨淮一帶原爲疏通餉道起見如果淮河一帶並無梗阻則此項米石無難運到又本日英桂奏河南解赴廬州米麥六千石尙在阜陽因無路可通不能前進福濟當設法迎提聊資接濟毋得一籌莫展以致坐困安徽藩司已簡放李孟羣該員見由湖北帶兵前來援應廬州諒計日可到矣將此由六百里加緊諭令知之○諭英桂奏勝保奏勦捻正當喫緊粵逆又圖北竄請飭派兵助剿等語頒上縣城當歸陳穎毫之衝勝保既親督前往諒能得力所請添兵之處九江郡城尙未克復楚軍何能分半赴豫況已撥往江西廣信並李孟羣帶兵一千五百名援應廬州武漢存兵已屬無多本日仍諭令官文胡林翼如襄樊已就肅清卽於該處官兵內酌撥一千名馳赴英桂等軍營調遣未知能否應付並運速如何勝保前奏截雷經過河南之陝甘官兵究竟是否到營連獲騰阿馬隊並見在暫留之察哈爾馬隊及山東官兵等爲數已不甚單自應先籌迎剿以遏賊鋒不可專恃添兵致令賊氛愈熾至直隸防兵據雙銳奏報已於二月二十九日由留智廟啟程史榮椿一軍據邵燦等奏報已赴亳州會同袁甲三堵剿由該漕督等另派吉林餘兵大同馬隊各二百名赴潁州助剿

英桂勝保即當迅速迎提以資攻剿至李孟羣由楚赴皖本為廬州喫緊起見本日已將該員改放安徽布政使尤應趕緊赴任儻此項兵勇路經河南地方該撫等不得率請截留致滋貽誤將此由六百里諭令知之○諭英桂勝保奏捻匪勾結粵逆竄擾順上勢甚危急光州亦形喫重該撫所帶兵勇不敷堵剿請於楚省酌撥馬步勁兵三四千名赴豫援應等語見在湖北襄樊一帶雖漸就肅清而巴揚阿一軍尚須在彼彈壓前後諭令酌量抽調應援廬州廣信等處其在九江者尚未克復城池自難分撥惟是河南安徽交界捻匪與粵逆勾連賊眾兵單係屬實情若不籌兵接濟深恐滋蔓難圖見在楚省情形究為稍緩著官文胡林翼妥為籌畫如襄樊一路已就肅清無須重兵彈壓即於此項官兵內湊撥一千名派委得力將弁管帶前赴河南交英桂勝保調遣以資助剿將此由六百里諭令知之○以李孟羣為安徽布政使羅遵殿為湖北按察使

運使遜監

○予安徽陣亡知縣金寶樹等祭葬世

職○辛巳諭內閣葉名琛奏廣東省員弁越境會剿匪徒掃平賊巢一摺廣西佃匪占踞橫州永淳縣地方各村疊次圍撲城池擾及廣東廉州府屬之合浦靈山等處經葉名琛派令高廉道蔡徵藩署廉州府知府沈保頤會同參將廖達章遊擊秦鳳山等督兵越境進剿於上年正月至二月先後攻破匪巢六十餘處將占踞之二百餘村全行收復擊獲匪徒掃平巢穴辦理尚屬奮勉所有在事出力官紳及前次會剿南甯府鬱林州等處匪徒出力各員弁均著葉名琛查明奏請獎勵○諭葉名琛奏廣甯懷集兩縣剿匪出力請保出力員弁一摺兩廣交界之廣甯懷集二縣壤地毗連匪徒易於藏匿官軍克復廣甯縣城後匪徒數千餘人勾結土匪滋擾自五年八月至本年四月經廣東署督標中營都司鍾文彩及廣甯縣知縣朱旬霖署廣西懷集縣知縣元慶等督率兩省文武員弁兵勇會合紳團先後將妙村各路匪徒首夥殲除淨盡賊巢概行焚毀奪獲槍礮器械鉛藥不計其數地方一律肅清該官紳等均能不分畛域認真剿捕辦理尚屬妥速所有此次出力文武紳團兵勇著葉名琛查明與前次克復廣甯縣城出力員弁併案保奏候朕施恩○葉名琛奏英吉利船隻自退出省河後復經官兵連旬擊剿疊次焚燒船隻兩旬之久尚無動靜聞該國以咆哈巴夏禮不應與中國啟釁另派人來粵定議虛實尚未可定奏入上諭以先定主見為將來定議地步儻此次派來之人尚諳情理亦須以禮相接勿使再有藉口俾得自為轉圜○以廣西柳州府城被賊竄陷提督惠慶解任來京下部嚴議巡撫勞崇光下部議處○是月減安徽亳州等九州縣上年被災額賦十分之一賑恤河南南陽縣被旱災民

咸豐東華錄七十

夏四月壬午朔予四川被戕州同崑秀祭葬世職○甲申諭內閣恆春奏分剿各路回夷復勝情形一摺雲南地西回匪經官兵追剿將積匪蘇發貴等擒獲正法見在師羅各營俱各誠心輸服江外肅清已革副將陳得功前因妄殺冒功發往新疆不准逗遛茲雖剿辦尚知愧奮惟該員獲罪較重所請免其發遣之處仍不准行著俟續有勞績再行奏請○諭軍機大臣等據德勒克多爾濟等奏俄羅斯欲遣使來京商辦密事一摺復據理藩院奏俄羅斯達喇嘛巴拉第具呈亦稱該國上司諭文欲差大臣進京等語著

該大臣等明白曉諭告以中國與爾國交好多年從無差大臣前來商辦要件之事本國但知遵守舊章永遠和好今爾國達喇嘛巴拉第在京呈稱爾國因英國有窺伺占踞之心欲差大臣來商機密事件已由理藩院具奏大皇帝念爾國道路遙遠向無差大臣進京之事已諭理藩院行知該國照例但送學生進京毋庸特派大臣前來至爾國既誠心交好從前止有恰克圖一處通商今大皇帝又准在伊犁塔爾巴哈台兩處通商相待可謂優厚見惟塔爾巴哈台焚燒夷圈一事應行查辦爾國既敦和好之情即當派員會同該大臣等秉公辦理速行了結以便照舊通商無傷和好此外並無應議事件毋庸特派大臣前來如此明白曉諭不可調兵防備故事張皇所有理藩院行薩納特文底鈔給閱看將此諭令知之○子雲南被戕知縣周錫桐等祭葬世職○乙酉諭軍機大臣等樂斌奏湖北撤回陝甘官兵未能調赴勝保軍營等語陝西撫標提標各兵業已撤回歸伍其肅州等協官兵亦已回抵隆德距各原營不遠且該兵丁見多患病兼在湖北繳出器械自應分別收伍未能調赴河南惟大股捻匪經勝保等擊敗後復勾結粵匪竄擾嶺上光州一帶情形亦甚喫重英桂等所帶兵勇不敷堵剿亟應設法湊撥以遏賊氛前據曾望顏奏因嵩縣肅清截止甯夏鎮兵四百名令其毋庸來陝此項兵丁如果得力堪以出調即著樂斌飭令前赴河南交英桂勝保調遣將此由五百里諭令知之○丙戌官文胡林翼奏查小池口下數十里與江西湖口對峙之段窰楓樹坳獨山鎮等處先後添築賊壘數十座外浚深濠藉爲小池口屏蔽以拒我師三月初九日江甯將軍都興阿先派營總薩林等帶馬隊二百名會同石清吉步隊繞道馳赴小池口東路埋伏續派翼長多隆阿率領馬步各軍進剿段窰都興阿自領總管巴依爾呼蘭副將鮑超駐小池口之西賊分三路出撲經鮑超等擊退其一股往援段窰被薩林等伏兵前後掩殺斃賊無數維時多隆阿甫至段窰見賊壘已成該逆又出眾數千列陣抗拒經營總密雅明阿等射斃騎馬賊目數名餘逆敗退立將賊壘十餘座毀平追殺至八里江斃賊千數百名溺死無算十三日多隆阿等由黃梅馳至楓樹坳賊匪踞山扼險築壘數里知我軍至賊又分三路出拒各二三千人多隆阿亦分三路應之同副將王國才由中路進巴依爾呼蘭同提督孔廣順等由南路進祿昌等由北路直前逆眾抵抗王國才等復分兵繞出山南賊壘之後擊斃守壘悍賊多名賊陣大亂紛紛潰竄巴依爾呼蘭等分路掩殺生擒四十餘名追殺十餘里斬賊三千數百名時已日暮多隆阿即傳令乘勝進剿獨山鎮賊遂於十五日四鼓捲甲馳赴至獨山鎮之陶岸嶺地方賊匪沿山築壘七大座外環深溝護以樹椿竹籤多隆阿因仰攻不易遂令孔廣順等以輕騎誘賊出巢而令馬步各隊分伏要隘值月明如晝該逆見我軍隊伍星散賊眾出壘迎敵我軍馬隊縱橫衝殺賊勢披靡而多隆阿等又已潛令開化勇越濠拔椿躍登賊壘盡齊拋火彈焚燒賊篷數百火光燭天賊眾狂奔我軍踏平賊壘奮力圍剿屍橫遍地又追殺三十餘里斃賊五千餘名先後溺水死者千餘名生擒數百名洵足以大挫兇鋒上諭內閣此次剿平小池口附近賊壘追至宿松先後斬擒賊首萬餘級辦理甚屬得手著官文等即飭帶兵各員乘茲銳氣迅克小池口並九江府城以遏賊衝所有出力員弁兵勇著官文胡林翼會同查明並歷次獲勝出力人員彙案保奏候朕